

Fut kale Fol em Auk Teben Fut Kolin Abiw Mutuk Fian em Sios Kawtiw ilo Dabalayemse Fut kale.

¹ Sunbin-Got e akalem ibolow fukunin kuw geleweko, Fol nelo galmoko, Kulais Yesus em kalan kunum kenemse te. Kame neso, Kulais elo ibolow fein dangbe kunum Timoti so, aso nu fut kale Kolin abiw mutuk fian ka biliw em sios kunum waneng yuso, Akaia aneng fian bomi, Sunbin-Got akalem galmose kunum waneng yuso, alik alik yulo dabalayemuw te. ² Aatim Sunbin-Got so, Kamok Fian Yesus Kulais so, yelim i yulo ibolow folok so, menew so, keyemboliwka!

Sunbin-Got em Ibolow Menew Duyembe Kukuw em Sang te.

³ Alik nu Sunbin-Got, nukalem Kamok Fian Yesus Kulais em Alew em wiin fian daoluma! E kinkin keyemin em mongom kayak keko, menew keyemeko, ibolow nanbow koyem kemin em Sunbin-Got ete te.* ⁴ E num sakik ilum kebuluw ibolow alik alik be fein atemeko, nulo ibolow nanbow koyemkabe kasike, mali kunum waneng numdiw sakik ibolow kebiliw tewe, nu ki keko, Sunbin-Got em nulo menew ibolow keyemeko, nanbow koyembe beemdiw nukati mali kunum waneng ilo akati menew ibolow keyemeko, nanbow kuw keyemkabuluw te. ⁵ Nimtew angom? Nu Kulais em gelewkabuluw beem mongom ete

* **1:3:** Ulom 15:5

kal ilum fian mak kuluwi, kal ilum be fian kele tewe, Sunbin-Got e Kulais em kokmen kel atin kuw ibolow nanbow koyemkabe kasike.* ⁶ Yu kilele ibolow fukunina! Aso nu yom gomet em dulum elote kal ilum kulukabuluw te. Nimtew angom? Aso nu kal ilum kuluw tewe, Sunbin-Got e nulo ibolow menew dukuko, ibolow nanbow koyemkabe angomi, aso nukati emdiw keko, yom kal ilum kulabiliw ding dim bakate, aso nu yulo dokoyemeko, finik so kulomin deiw mo koyemuwi, yu ibolow falit angeko, ibolow nanbow angeko, bokoliw kasike. ⁷ Bomeliwi, aso nu yom kakabiliw be atemeko, kilele kal keluwete: Feinka! Yom kal ilum kulubiliw ding dim bakate, Sunbin-Got e yulo ibolow menew keyemei, aso num ibolow menew kulukabuluw atew yukati ibolow nanbowko, kulu boliwka!

⁸ Nakunum kumel kunum waneng yutaka! Yu weng kal bakate kame kal kelina! Esia aneng fian kel, kal ilum fian mak nulo yemkatiko koyemei, num kitil e dang so ayemei, aso nu mewso kuanomin kis kesuluw te.* ⁹ Beem ding dim bakate, aso nu geeyemin kunum mak em weng “Kaso yu kuanokoliw te!”, yange weng beemdiw kiliko, aso nu ibolow fukunomeluw: “Bomin deiw mak banim! Kame kuanuw kai!”, angsuluw te. Kate, beem ding kabalak e, aso nu kilele atemuwete: Fein, nukalem kitil e fong gel kate, Sunbin-Got em kitil e atin kuw fian keko, e ki keko, kuansiliw kawtiw ilo yemkalfolkabe te. ¹⁰ Beli, e num kal ilum fian be atemeko, nulo kilele

* **1:5:** Sim Fut 34:19 * **1:8:** Kalan Kunum 19:23; 1 Kolin 15:32

dokoyemse kasike, aso nu kilele kal keluwete: Kame akal sow akal, diwkuw diwkuw e nulo fein dokoyemboke te.* ¹¹ Kasike kame, yu aso nuso bongguko, Sunbin-Got eso weng bokosomeliwi, e alik num weng bakabuluw weng be kiliko, nulo fein dokoyemkabe te. Dokoyemei, kunum waneng tulun kuw bikati Sunbin-Got elo “Weso! Seyo! Ku ilo dokoyemselew te!”, dangbokoliw te.

Fol e Ibolow Kainbi Kose Kunum te.

¹² Yutaka! Aso nu nukalem sen so banim keko, Sunbin-Got so ibolow ki makmak kebuluw ibolow fukunin kiol be atemeko, ki keko, kalfongso keko, aso nukalem sul so kebuluw te. Nimtew angom? Aso nu fein kiol kuw kukuw keko, Sunbin-Got em kiin dim e sen so banim kesomi, kawin dim kaleem kal mak gelewinba kebuluw kate, em ibolow folok kukuyemkabe deiw kuw gelewbomi, kakawkabuluw kasike. Feinka! Aso nu kawtiw alik alik im kiin dim e beemdiw kakabuluw kate, aso nu kitil kuw keko, yukalem kiin dim e, atin kuw kiol kuw kukuw kuw gelewkekawkabuluw te.

¹³⁻¹⁴ Nakunum kumel kunum waneng yutaka! Aso num yulo fut boluw weng kale yu ki keko, kilele teing bokoko, diwsomi, kal keliw kate kame, yu weng anung anung dolon kelinba kebiliw te. Kebiliw angomi, ne sow em toloke ding fenbi te. Beem ding dim kabalak e, yu weng be fein kilele dolon kelokoliw te. Dolon kesomeliwi, nukalem Kamok Fian Yesus em iti toloke ding kabalak e, aso num yom wiin yemsulokoluw

* **1:10:** 2 Timoti 4:18

emdiw yu aso num wiin akati fian kuw yemsulko, daoyemokoliw te.*

¹⁵ Ne atin kuw kal kelite: Yu nem boyemsi weng be kilele kiliko, dolon kelokoliw kasike, “Emisik yom mit toloki kai!”, angeko, ibolow fukunsi te. Kaneko beli, yu nelo alew ding mak netemeko, bamki alew keko, kulokoliw te. ¹⁶ Emisik dim e, nem Masedonia aneng fian ka unoki ding dim bakate, emteben e, nem iti Masedonia kolewoko, yom fukun teli kano, yu nelo dokonemeko, Sudia aneng fian elo namdalokoliw ding ete te.*

¹⁷ Kate, nem “Kaneloki!”, angbi be, ki kelinba kese te. Kasike kame, yu netemeko, “E kilele ibolow fukuninba keko, dasuw bakayemin kunum te!”, nangbiliw sako? Meni, ne kawin dim kaleem kunum imdiw keko, “Noya!”, angbi kate, “Bayo!”, angeko, ibolow fukunkabi kunum nete sako?

¹⁸ Kate babo! Sunbin-Got katiw beem kiin dim e ne yulo fein weng bokoyemsomi, “No!”, yange “Ba!”, yange weng alew weng be nam bongguko, bokoyemi te.

¹⁹ Yu kilele ibolow fukunina! Ne e, Timoti e, Sailas e, alemsal nu yom mutuk teleko, Sunbin-Got em Min Yesus Kulais em sang bokoyemkabuluw te. Kate, Yesus em sang bakate “No!”, angbin so, “Ba!”, angbin so weng alew be bongguko, bin em sang emdiw bate. Feinka! Sunbin-Got e Kulais Yesus beem dulum elote kunum waneng nulo weng makmak kuw keko, “No! Fein tako!”, yangakabe te.* ²⁰ Nimtew angom? Sunbin-Got em “Kanelo yo!”, angse weng alik alik be Kulais

* **1:13-14:** 2 Kolin 5:12; Filibai 2:16 * **1:16:** 1 Kolin 16:5-6

* **1:19:** Kalan Kunum 18:5

em dim e “Fein!”, angeko, kanebe kasike. Beem mongom ete num Sunbin-Got em wiin daolew-buluw ding dim bakate, nu Kulais em wiin dim e “Amen!”, dangakabuluw te.* ²¹ Kasike kame, Sunbin-Got e aso nuso yuso, alik nulo Kulais eso fewtokoko, kitil moko, finik so kulomin deiw dim da koyemse te. Da koyemsomi, nulo akalem wiin so amkoko, bamki duyemsomi, “Nem aluw-bamin aluwina!”, yangse te. ²² Yangeko, num dim akalem bat so atew duku koyemsomi, Sunbin-Finik esik imin wanin atew num ibolow tem kel akimse te.*

²³ Sunbin-Got katiw beem kiin dim e ne fein weng be bokoyemite: “Ne yulo kal ilum duyem-inba kelo!”, angomi, beem mongom ete kuw Kolin abiw mutuk fian kalo telinba kesi te. ²⁴ Feinka! Yukalem fein ibolow e kitil keko, mobe kasike, aso nu yom fukun teleko, yom fein ibolow be num ibolow fukunin beem afak dalomin nam toluw te. Kate, aso nu ibolow fukunomeluw: “Aso nu yuso bongguko, yom finik so deiw kakamin em kalfong fian kemuma!”, angeko, buluw te.*

2

¹ Nem ibolow fukunin fian e kanekote: Sakik ilum ding kame kale, ne yom fukun nam teli te.* ² Nimtew angom? Ne yom fukun teleko, alik yom ibolow ilum so keli tewe, nimin ete nelo dokonemeko, nem ibolow ilum be kalfong

* **1:20:** 1:20 Kibulu weng beem mongom e kanekote: “Feinka!”.

* **1:20:** Fitew Dase 3:14 * **1:22:** 2 Kolin 5:5; Efesus 1:13-14

* **1:24:** 1 Fita 5:3 * **2:1:** 1 Kolin 4:21

so kenemboke a? Yom dim e kalfong dune-min kunum waneng mali mak so banim kasike!
³ Yom dim em “Ilum banimok!”, angomi, beem mongom ete ne emisik fut boko, dabalayemsi te. Nimtew angom? Yu nelo kakat dukanembiliw kunum waneng angomi, yu kanelom nelo sakik ilum dunemokoliw te! Babo! Kate ne kilele kal kelite: Ne sakik ilum banimeko, kakat so yom fukun teli tewe, nem kakat beem dim e alik alik yukati kalfong fian so kulokoliw te. ⁴ Nakunum kumel kunum waneng yutaka! Nem emisik fut bosu fut beem ding dim bakate, ne sakik ilum so bomi, amesomelii, kiin ok mit dakamsomelii, fut be boko, yom dim dabalayemsi te. Ne ibolow fukunite: Ilo kal ilum mak duyeminba keli kate, i fut kale teing bokoko, kilele atemomeliw: “Fol e nulo ibolow mutuk fian duyemkabe kai!”, angeko, kal kelokoliw te.*

Ibolow Sili Sili Sak Misim Kuw Koyemkabiliw em Weng te.

⁵ Yuso bomi, kal ilum ding kale keeme kunum e nelo kuw sakik ilum keneminba kese kate, mali sios kunum waneng yuso neso bongguko, kal ilum duyemse te. (Mesik esik kunum be atin kuw ilum fian mak kule tewe, ne “**alik alik** sios kunum waneng ilum duyembe” anginba kebi kate, “**mali** sios kunum waneng ilo” weng bete kuw boyemsi te.)* ⁶ Sios kunum waneng yom bonggu teineko, weng bokosomeliwi, em kanebe kukuw be diweko, geelewsiliw em yan wa be kame ki kelewbe kasike ⁷ kame, yu em sili sili nam

* **2:4:** Kalan Kunum 20:31 * **2:5:** 1 Kolin 5:1

kukuw be sak misim kuw kulu kolewsomelei, e iti nanbow keko, ken abin teinoka! Mesik esik em kanele kal ilum be elo atin kuw an mit da kolewoke kasike. ⁸ Keko beli, sios kunum waneng yu kame iti bonggu teineko, weng bokosomeliwi, yu elo kilele kukulewomeliw: “Nu kulo ibolow mutuk fian dukembuluw te!”, dangboliwka!

⁹ Nakunum kumel kunum waneng yutaka! Suaem fut bosu beem mongom mak e kanekote: “Yu nem weng bosu weng be teing bokoko, kilele gelewokoliw bani ba?”, angeko, ibolow fukunbi te. ¹⁰ Kate yu kilele kililina! Nimin kunum waneng ite mak yu im sili sili nam kukuw sak misim kuw koyemiw tewe, ne yulo yenggelew-somi, im sili sili nam kukuw bakati sak misim kuw koyemoki te. Feinka! Nimin sili sili nam mak be tewe, ne yom ibolow fukunsomi, Kulais em kiin dim kel sili sili kukuw be sak misim kuw koyemoki te. ¹¹ Nimtew angom? Alik nu Seten-Ataanim em “Kanelina! Kanelina!”, yangbe kukuw be kilele kal kesomeluwi, em nulo funum keyemsomi, nulo yemkatiko koyem kemin deiw mak fenkabe kukuw be kilele kal kebuluw kasike.*

Fol em Aluwbam Kakabise em Sang te.

¹² Nakunum kumel kunum waneng yutaka! Nem Toloas abiw mutuk fian ka uneko, Kulais em Weng Kal Ken Ati be bokoyem yak yak unsi ding dim bakate, Kamok Fian e weng beem deiw e fein wan kese te.* ¹³ Deiwan wan kese kate, ne yom sang so de toloke nakunum Taitus elo ka ateminba kebi

* **2:11:** Iluk 22:31 * **2:12:** Kalan Kunum 14:27; 1 Kolin 16:9

kasike, sakik so ibolow ilum kulusomi, ka biliw kunum waneng ilo “Yukal o!”, yangeko, Taitus em deiw dililewkem Masedonia aneng fian elo unsi te.*

¹⁴ Diwkuw diwkuw ne Sunbin-Got elo “Weso! Seyo!”, angakabi te. Nimtew angom? Kulais e nulo akalem weng afak kunum keyemeko, num yemtolo kakamin Kamok Fian kelei, kawtiw alik alik i em afak bomeliwi, nu kalfong keko, elo gelewkabuluw kasike. Keko beli, nalem aneng aneng mak nu elo gelewsomeluwi, e nulo auk so keyemei, num kawtiw ilo Kulais elo kilele kukuyemeko, bokolew bokolew weng be kunum waneng im kiin dim e kamge ken ati emdiw keyemkabe te.

¹⁵⁻¹⁶ Num kamge ken ati sang be Kulais em kamge Sunbin-Got em mit mewso unakabe kamge bete te. Beli, mali kunum waneng finik so kulomin deiw gelewabiliw kunum waneng i kamge ati te be kimiyemeko, “Finik so kulamin em kamge ati te kai!”, yangbiliw kate, kuanomin deiw gelewabiliw kawtiw i kamge ati te be kimiyemeko, “Ibo! Kuanomin em einting kai!”, angeko, fein kuanokoliw te.*

Ibo! Nimin ete ki keko, Kulais em kamge so auk so sang ati te be bakayem tem de unemokoliw a? Yakae! Num kitil e fong gel kasike! ¹⁷ Kate Fol so Timoti so, aso nu Sunbin-Got em kiin dim e Kulais em kitil so Sunbin-Got em weng be kilele fitew dim bokolew bokolew kekabuluw te. Aso nu mali kawtiw imdiw ba kate, aso nu Sunbin-Got em bontem dim weng be kiol kuw yangeko, bokoyemkabuluw te. Kate mali kawtiw

* **2:13:** Kalan Kunum 20:1 * **2:15-16:** Iluk 2:34; 2 Kolin 3:5-6

bi Sunbin-Got em weng kuluko, wemin eisneng emdiw kelewko, tum win so alwol kelew kelew kekabiliw kasike.

3

Finik so Weng Kal Fut em Sang te.

¹ Eke nakunum kumel kunum waneng yutaka! Fol so Timoti so, aso nu nono keluw ete, iti nukalem wiin daobuluw a? Aso nu mali kunum waneng im num sang bosiliw em fut kuluko, yulo duyemsomi, yu teing bokoko, num kiol kukuw kilele kal kelokoliw a? Aso nu mali kawtiw imdiw keko, “Yu nukalem sang ken em fut mak boluw kano, nu fut beelo de uneko, mali kawtiw ilo kukuyemokoluw te!”, yangbuluw bani? A babo!*

² Yukalem ete yu aso nukalem sang ken bakabe fut atew te. Kebomeliwi, fut beem weng be aso num ibolow tem kel boluw, mali kawtiw alik alik i fut beem weng be kilele atemeko, aso num kukuw ken be atin kuw kal kemoliw te.* ³ Nintew angom? Kulais e aso num aluw bamin e akalem fut kom atew kelewko, bose kasike. Kate, e tum dim kel sak bomin eisneng so bolinba kese kate, finik so bin Sunbin-Got em Sunbin-Finik so kunum waneng yom ibolow mutuk tem kel fut be bose te.* ⁴ Kulais e alik beemdiw kebe kasike, alik nu atin kuw kal keluwete: Sunbin-Got e fut be kilele ken kuw bose te.

⁵ Keko kasike, aso nukalem kitil ete nu ki keko, aluw bamin be diwoko, “Nukalem kitil ete kebuluw kae!”, angeko, nam aluw bamuw te.

* **3:1:** Kalan Kunum 18:27; 2 Kolin 5:12 * **3:2:** 1 Kolin 9:2

* **3:3:** Aneng Kolew 24:12; Selemaya 31:33; Esekiel 36:26-27

Kate, Sunbin-Got em kitil ete kuw aso nulo ki keyemse te. ⁶ Ki keyemse kasike kame, alik nu em kitakamin weng kikis em weng afak kunum waneng kekabuluw te. Kitakamin weng kikis be suaem kitakamin weng emdiw tum dim kel bolinba kese kate, Sunbin-Finik so bose te. Nimtew angom? Suaem kitakamin weng be kuankemin em deiw wan kese kate, kitakamin weng kikis be finik so bin duyemkabe kasike.*

Kitakamin Weng Kikis em Aluwbamin Atite em Weng te.

⁷ Nakunum kumel kunum waneng yutaka! Sunbin-Got e suaem kuankemin em deiw wan kese kitakamin weng be tum dim kel bose kale. Bose ding dim be, kitakamin weng be auk so kitil so kese kasike, Moses em fut be kuluko, talse ding dim bakate, em kiinguen e ailbin fian so ailse kale. Ailbin be awkol awkol keko, daking angse kate, em tele ding dim bakate, Isalael kawtiw i ki keko, elo ateminba kesiliw kale.* ⁸⁻⁹ Feinka! Suaem kuankemin em deiw wan kese kitakamin weng be ken kuw auk so kitil fian kese kate, Sunbin-Finik em nulo Sunbin-Got em kiin dim e kiol kuw kunum waneng keyemkabe aluwbamin beem kitil so auk so be atin kuw katiw uneko, suaem kitil so auk so be bakilewkabe te.* ¹⁰ Yu kilele ibolow fukunina! Kameem weng kitakamin kikis em auk so kitil e atin kuw fian kebe kasike, e suaem weng kitakamin beem abin kulei, beem auk so kitil daking banim tew kekabe te. ¹¹ Nimtew angom?

* **3:6:** Selemaya 31:31; Sion 6:63; 1 Kolin 11:25 * **3:7:** Aneng Kolew 24:12; 31:18; 34:29-30 * **3:8-9:** Sawa Weng 27:26; Ulom 1:17

Suaem kitakamin weng be sukum ding kuw bomi, auk so kitil so ken ailbin so fitewse kate, kameem kitakamin weng kikis be diwkuw diwkuw bomi, auk so kitil so ailbin filik fian so ke alakabe kasike.

¹²⁻¹³ Nakunum kumel kunum waneng yutaka! Nu kitakamin weng beem sang kiliko, “Fein!”, dangbuluw kasike, nu Moses emdiw kelinba keko, kitil kuw moko, finganinba kebuluw te. Moses em kiinguen dim ailse ding dim bakate, e ilim bala kuluko, kiinguen kasi kolewse kale. Nimtew angom? E ibolow fukunomele: “Mesik esik Isalael kawtiw i nem kiinguen em daking banim tew angakabe ailbin bete kuw kiin atat kelokoliw kae!”, angomi, kanese kasike.* ¹⁴ Kate, Isalael kawtiw im ibolow fukunin e du keyemse kale. Du keyemei, sua atew kame akal, emisik kitakamin weng fut teing bokoliw ding dim bakate, ilim bala atew be diwkuw diwkuw im ibolow fukunin be kasi koyemkabe te. Mak kawtiw mak i ilim be nam kulu koliw kate, Kulais em kitil ete kuw ki keko, fein kulu koloke te. ¹⁵ Feinka! Sua atew kame akal, mali im Moses em suaem kitakamin weng fut teing bokoliw ding dim e, ilim bala atew be im ibolow fukunin e kasiko, ge koyemkabe kate, ¹⁶ nimin kunum waneng ite mak ikalem kakabiliw deiw kolewko, Kamok Fian em mit elo uneko, deiw be kakamiw tewe, esik ilim bala be fein kulu koyemkabe te.* ¹⁷ “Kamok Fian” angsi weng beem mongom e Sunbin-Finik ete te. Nimin kunum waneng im dim ete Sunbin-Finik be be tewe, biim kakamin beem dulum elote eisenng mak nam ambet koyembelei, i dolon

* **3:12-13:** Aneng Kolew 34:33 * **3:16:** Aneng Kolew 34:34

kuw kakamoliw te.* 18 Nakunum kumel kunum waneng yutaka! Alik alik nu kiinguen ilim bala banim buluwi, ok takak emdiw so Kamok Fian em ailbin filik so atebabuluw te.* Atemsomeluwi, Kamok Fian e akalem Sunbin-Finik so num dim aluwbabomi, nulo ailbin filik mak so mak so duyemei, nulo alwol keyembelei, fe kabalak e, nu akalem takak ailbin filik ati te so beemdiw kelokoluw te.

4

Sunbin-Got e Akalem Weng e Baluw Kunum im Teing Dim elo Dase em Sang te.

1 Nakunum kumel kunum waneng yutaka! Sunbin-Got e nulo kinkin keyemeko, kitakamin weng kikis beem aluwbamin duyemse kasike, nu nam beit keko, kolewuw kate, 2 nu kitil kuw moko, wa kukuw so, inkal duyemin kukuw so, alik alik be ibiku koyemkabuluw te. Ibiku koyem-somi, mali kawtiw ilo funum funum keyem-somi, Sunbin-Got em weng fein be alwol kelewko, nanew kelewinba kekabuluw te. Kate, nu kaim dim fein weng kuw bakayem bakayem kekabuluw te. Kebuluwi, kunum waneng alik alik ikalem ibolow tem kel Sunbin-Got eso ibolow ki makmak keko, num kanebuluw be diw atebamoliwka!*

3 Keko beli, num weng bakabuluw weng be mali kawtiw kuankemin em deiw kakabiliw ite kuw kiliko, kilele ateminba kekabiliw te. 4 Nimzew

* **3:17:** Sion 8:36; Ulom 8:2 * **3:18:** 3:18 Gilik weng sin beem mongom mak e kanekote: "Alik alik nu kiinguen ilim bala banim bomi, ok takak atew kesomi, Kamok Fian em ailbin fibilik so be mali kunum waneng ilo kukuyemkabuluw te." * **4:2:** 2 Kolin 2:17; 1 Tesalonaika 2:5

angom? Kawin dim kaleem got Seten-Ataanim e fein ibolow kelinba kebiw kawtiw im ibolow fukunin be aimge koyemse angomi, i ki keko, Sunbin-Got em takak kebe Kulais em Weng Kal Ken Ati kaleem auk so kitil so ailbin fian beelo kilele ateminba kebiw kasike.* ⁵ Yu kililina! Nu nukalem sang ete bakayeminba kekabuluw kate, nu **sang fian** “Kulais e Kamok Fian te!”, ange ange keko, bakayemkakawkabuluw te. Bakayembuluw kate, nukalem **sang gel** e kanekote: Yesus e nulo yom weng afak kunum keyemse te. ⁶ Keko beli, Sunbin-Got e sua e bokolomele: “Mililiw be ‘Felet mak angoka!’”, ange Sunbin-Got be num ibolow mutuk kel akalem auk so kitil so Yesus Kulais em kiinguen ailbe ailbin filik so bakati num ibolow dolon keyemkabe te.*

⁷ Kate, nu on kisol fian emdiw eisneng be kawtolomin ok sen dim kel atew keko, aluwkabuluw kasike, kawtiw alik alik i kilele atemiwete: Nukalem kitil fong gel em dim ba kate, “Sunbin-Got em kitil auk so fian ete kuw kaneliw kai!”, angakabiliw te.* ⁸ Feinka!

Nu kal ilum fian banban kulukabuluw kate, ilum be nulo nam kawtol koyeme te.

Nu teifuluko, ibolow fukunin alew so buluw kate, num ibolow mutuk miyak so nam dakulu yeme te.*

⁹ Mali kawtiw i nulo yenomine keko, yenkabiliw kate, Sunbin-Got e nulo koyeminbakabe kasike, nu nam kuanuw te.

* **4:4:** Efesus 2:2; Kolosi 1:15; Kibulu 1:3 * **4:6:** Talfut Kese
 1:3; Aisaya 9:2; 2 Kolin 3:18 * **4:7:** 2 Kolin 5:1 * **4:8:** 2 Kolin
 1:8; 7:5

- 10 Diwkuw diwkuw nu kal ilum kuluko, Yesus em kuanse sang bakayem tem bakayem tem kakabomi, nukal kuanomin kis kebuluw kasike, beem mongom ete Yesus beem finik so duyemin sang akati bakayem tem bakayem tem kakabuluw te.*
- 11 Kakabuluwi, mali kawtiw i nulo yenomin deiw feneko, Yesus em finik so buluw kunum waneng nulo “Yulo yenuwi, yu kuanina!”, yangbiliw kasike, nukalem kuanomin kis kebe kal dim beem dim kel e Yesus em finik so bin duyembe be fein fitewoke te.*
- 12 Keko kasike, aso num aluwbamin beem mongom ete kuankemin e nukalem kal dim kel ambet keyembe te. Kate, aso num aluwbamin beem mongom ete finik so kulamin e yukalem mutuk dim kel kitil kuw aluwkabe te.
- 13 Num fein ibolow e Sunbin-Got em fut bose kunum beem fein ibolow emdiw kekabe te. E fut tem kel bolomele: “Ne Sunbin-Got elo ‘Fein!’, dangbi kasike, em weng bakayemkabi te!”, angse kasike, nukati bakatetew keko, em weng bakayem kakawkabuluw te.*
- 14 Nimtew angom? Nu kilele kal keluwete: Sunbin-Got e Kamok Fian Yesus elo dawkalfolse beemdiw nukati eso yemkalfoleko, nuso yuso bongguko, em mit mewso mo koyemoke kasike.*
- 15 Feinka! Alik alik kanebe be yom gomet ete keyemkabe te. Keyembelei, Sunbin-Got em ibolow folok e kunum waneng banban dokoyemei, i tulun kuw keko, im Sunbin-Got elo “Weso! Seyo!”, angak-

* **4:10:** 1 Kolin 15:31 * **4:11:** Ulom 8:36 * **4:13:** Sim Fut 116:10
 * **4:14:** 1 Kolin 6:14

abiliw weng bakati fian kuw kesomelei, Sunbin-Got e wiin fian mak kulabe te.

Sow em Wiin so Kemokoluw em Sang te.

¹⁶ Nakunum kumel kunum waneng yutaka! Num kal anggил be diwkuw walomin kebe kate, Sunbin-Got e num mutuk tem be diwkuw diwkuw kikis kelew kabe te. Beem mongom ete nu gatak wakmininba keko, melmel senko, kak-abuluw te.* ¹⁷ Nimtew angom? Num kaleem ding em kal ilum gel be sukum ding kuw nulo kal ilum yemkatikoko, koyembe kate, sow ete, num abiil tikin bokoluw ding kabalak e, kal ilum beem aluw bamin beem mongom ete nu banimominba wiin atin kuw fian mak kulokoluw kasike.* ¹⁸ Keko beli, nu kawin dim kaleem kiin so atebuluw beem eisenng elo atemeko, ibolow dulewinba kekabuluw kate, nu kiin so ateminba eisenng beem ibolow kuw duleweko, kiin sonolewkabuluw te. Nimtew angom? Kiin so atebuluw eisenng be banimoke kate, kiin so ateminba eisenng be sunsun kuw boke kasike.*

5

¹ Kaneko beli, nu kilele kal keluwete: Num kawin dim kaleem ding em deiw am emdiw kal anggил beem dakaloke ding dim e, Sunbin-Got e nulo abiil tikin kel am kawtiw im teing dim gelewinba sunsun boke am kikis mak duyemoke te.* ² Kate kame, nu kawin dim kaleem buluw ding em deiw am bomeluwi, amebomi, abiil katiw beem kulokoluw am beelo ibolow danong kesomi, “Kal

* **4:16:** Efesus 3:16 * **4:17:** Ulom 8:17-18 * **4:18:** Kolosi 1:16 * **5:1:** 2 Kolin 4:7

anggil kikis be ilim atew minggibuma!”, angeko, alakabululw te.* ³ Bomeluwi, num kuaneko, kal anggil be ilim atew kolewokoluw ding dim e, nu nam kal fitew emdiw keko, buw te. ⁴ Feinka! Num kawin dim kaleem kal anggil be kal ilum fian kulukabe kasike, nu “Kal anggil kale koluma!”, anginba kekabuluw kate, nu “Abiil katiw beam kal kikis be num kal anggil kale kame ilim atew kilis keloka! Keko beli, kuankemin kal kale be alwol keko, kuaninba kal keloke kai!”, angakabuluw te. ⁵ Yu kililina! Sunbin-Got e nulo memen keyemeko, “Kal anggil kikis fein kulokoluw te!”, yangomi, num ibolow tem kel Sunbin-Finik esik imin wanin atew duku koyemse te.

⁶⁻⁸ Feinka! Num kawin dim kale buluw ding dim bakate, nu kaneloke eisneng ateminba kebuluw kate, nu Sunbin-Got elo “Fein!”, dangeko, kakabuluw te. Kasike kame, nu diwkuw diwkuw melmel senko, kal keluwete: Kawin dim kaleem kun so kal so buluw ding dim bakate, nu Kamok Fian eso bin e singam kebuluw kate, nu ibolow kakil danong kebomi, kal anggil kale koleweko, kikis kal kuluko, diwkuw diwkuw Kamok Fian mewso bomi, ibolow nanbow bokoluw dim kel bokoluw te.* * ⁹ Keko beli, num kawin dim kale kal so kun so buluw ding akal, num sow em abiil tikin bokoluw ding akal, diwkuw diwkuw nu kitil kuw keko, “Sunbin-Got e num dulum elo kakatyemoka!”, angeko, buluw te.* ¹⁰ Nintew angom? Deiw mak ding mak e, Kulais e alikum nulo fein diw yetemoke kasike. Diw yetem-

* **5:2:** Ulom 8:23 * **5:6-8:** Filibai 1:23 * **5:6-8:** Kibulu

11:13-16 * **5:9:** Kolosi 1:10; 1 Tesalonaika 4:1

somelei, alik nu em nulo “Ken kukuw gelewka-biliw te!”, yangoke weng bani, “Wa kuw kukuw gelewka-biliw te!”, yangoke weng beem yan e fein kulukoluw te.

Kasak Sen Aluwbuluw em Weng te.

¹¹ Feinka! Nu kilele kal keluwete: Kamok Fian beem geeyemoke ding fein toloke kasike, nu fingansomi, mali kawtiw ilo kitil weng mak bokoyemomeluw: “Yukati kiliko, Sunbin-Got elo ‘Fein!’, dangina!”, yangbomeluw, Sunbin-Got em kiin dim e kiol kuw kukuw geleweko, em Weng Kal Ken Ati Weng be atin kuw kilele bokolew bokolew keyemkabuluw te. Nakunum kumel kunum waneng yutaka! Yu yom ibolow mutuk dim kel nukalem kukuw akati kilele diw atemeko, “Kiol kuw kukuw gelewka-biliw kai!”, yangeko, fukunemoliwka!

¹² Eke! Iti nukalem wiin daokabuluw sako? Babo! Num fukunin e kanekote: Yu num kiol kuw kukuw be kilele diw atemeko, beem mongom ete kalfongsomi, ki keko, mali kawtiw ilo kilele yan weng mak bokoyemka-biliw te. Mali kawtiw bi yom mutuk dim teleko, kal dim matem e ken kukuw kuw gelewsomi, ikalem wiin daobiliw kate, im ibolow mutuk tem e i sili sili kukuw kuw gelewka-biliw te. ¹³ Yu kilele ibolow fukunina! Yu mali kawtiw im bontem dim angbiliw weng bakati bokoko, “Fol e ibolow kau angeko, akalem ‘Kaneloki!’, ange ibolow bete kuw aluwbomi, sali sali unakabe kai!”, angbiliw kate, ne Sunbin-Got em kiin dim aluwkabi kasike, kanekabi be akalem eisneng ete kuw te. Kate, num yom dulum talsuluw ding dim kabalak e, nu ibolow kau anginba

kesomi, kiol kuw fukuneko, yulo kiol weng kuw bokoyemkakawkabuluw te. ¹⁴ Nimtew angom? Kulais em ibolow mutuk e nulo bokoyemomele: “Yu kun kuluko, kun moyembelei, em aluwbamin be kilele aluwbina!”, yangakabe kasike. Yang-bomeluwi, nu diwkuw kal keluwete: Kulais e kunum waneng alik alik num abin kuluko, num gomet kuanse kasike, kanese beem dem e alik alik nukati eso kuansuluw te. ¹⁵ Keko kasike kame, finik so buluw kunum waneng nu nukalem ibolow fukunin ete kuw gelewinba kekabuluw kate, num abin kulusomi, kuaneko, iti finik so baba teinse kunum beem ibolow fukunin ete kuw gelewkabuluw te.*

¹⁶ Kasike kame, nu suaem deiw kakabuluw em kukuw gelewinba keko, mali kunum waneng ilo kal dim kuw diwyeminba kekabuluw te. Fein! Sua e, nu dil em deiw kakabuluw em kukuw geleweco, Kulais elo akati sak kawtiw imdiw diw atemsuluw kate kame, nu elo beemdiw diw atemeko, kal kelinba kelewkabuluw te. Babo! ¹⁷ Nimtew angom? Kame, nu Kulais eso fewtoko-suluw kunum waneng keko, alwol kesomi, kikis kunum waneng kebuluw kasike. Fein! Suaem kemaluw e kame banime, nu atin kuw kikis kunum waneng kebuluw te.* ¹⁸ Nakunum kumel kunum waneng yutaka! Sunbin-Got ete alik alik eisenng be kilele kelewsomi, Kulais elo em tele num tele beem mutuk kunum kelewse te. Kelew-somelei, e fein ibolow so kunum waneng alik alik nulo kanese beem kasak sen weng em kalan

* **5:15:** Ulom 14:7-8 * **5:17:** Ulom 8:1; Galesia 6:15

kunum waneng keyemse te.* 19 Num teing dim dukuse kasak sen weng be kanekote: Sunbin-Got e Kulais elo em tele, kawin dim kaleem kawtiw alik alik num tele, beem mutuk kunum kelewsemi, kawtiw num sili sili kukuw e teing bokoko, beem yan wa be duyeminba kekabe te.* 20 Nakunum kumel kunum waneng yutaka! Kame, Sunbin-Got e nulo yamdalei, nu Kulais em bontem dim bakamin kunum kebomi, yulo kasak sen kitil weng be bokoyemomeluw: “Kulais e Sunbin-Got em tele kunum waneng num tele beem mutuk kunum keko, ibolow menew keyemse kasike kame, yu em mit mewso telina!”, yangeko, gaayemkabuluw te. 21 Yu kilele ibolow fukunina! Sili sili ibolow e Kulais em dulum elote banimse kate, Sunbin-Got e num ibolow fukuneko, Kulais beelo sili sili nam atew kelewse kasike kame, nu beem mongom ete Sunbin-Got em kiin dim e kiol kuw kukuw so kunum waneng kekabuluw te.*

6

1 Kasike, alik nu Sunbin-Got eso fangfang dakabuluw kunum waneng kebomeluwi, aso nu yulo kitil weng mak bokoyemuwete: Yu kanelom Sunbin-Got em yulo kukuyemse folok ibolow be tutumokoliw te! Babo! 2 Nimtew angom? E bokolei, Aisaya e fut tem boko, bokolomele:
 “Ken ding ati e, ne kom gaanemin be kiliko, wosuli te.

* 5:18: Ulom 5:10 * 5:19: Ulom 3:23-25 * 5:21: Kibulu 4:15

Kulo wosusi ding dim be, ne kulo dokoke-
meko, finik so kulamin deiw kel mo
kokemsi te.”,
angse kasike. Kame yu kilele kililina! Kame em
ding kale “**Ken ding ati!**”, angse ding ete te! Keko
beli, kame em nulo “**Finik so kulamin deiw mo
koyemoki!**”, angse beem ding ete te!*

Kalan Kunum im Aluwbameliw em Sang te.

³ Nakunum kumel kunum waneng yutaka! Nu
kitil kuw keko, mali im kakamin deiw kel kumin
koyemin beem mongom mak nam dukuko, kaim
daluw te. Babo! Mesik esik mali kawtiw i “Fol
em aluwbamin beem sen ete nu kuminuw kai!”,
angeko, num aluwbamin beelo kalak dako, desi
keyemokoliw kasike. ⁴ Kate nimtew eisneng ete
nu aluwuw tewe, aso nu mali kawtiw ilo kilele
kukuyemuwete: Aso nu Sunbin-Got em weng
afak kunum nute te! Bomeluwi, aso nu diwkuw
diwkuw ibolow falit kukuw kuw beem afak kak-
abuluw te.

Kal ilum ding dim bakate,
ibolow tilel kemin ding dim bakate,
sakik ding dim bakate,

⁵ mali i aso nulo yebiliw ding dim bakate,
i nulo sok am dim koyembiliw ding dim bakate,
mali im ibolow daok angeko, aso nulo yebiliw
ding dim bakate,
aso num bukeko, kebuluw ding dim bakate,
ibolow tiaktiak kesomi, akalinba kebuluw ding
dim bakate,
yemen tewso buluw ding dim bakate,

* **6:2:** Aisaya 49:8

beem ding alik alik be aso nu diwkuw diwkuw
Sunbin-Got em aluwbamin bete kuw fukuneko,
aluwbabuluw te.* 6 Feinka! Aso num kukuw
gelewkabuluw kukuw e kanekote:

Sunbin-Got em kiin dim e kiol kuw kukuw e,
ibolow kal ken so kukuw e,
ibolow falit so kukuw e,
ibolow kinkin kukuw e,
ibolow mutuk dulew dulew kukuw e,

Sunbin-Finik em kitil dim kakamin kukuw e,*
7 fein weng bakamin kukuw e,

Sunbin-Got em aso nulo kitil duyemkabe dim
beem kakamin kukuw e,
aso nukalem kiol kuw gelewkabuluw kukuw
bete on balam teing yuk so awan so aluwko,
ganakabuluw kukuw e,

kaneko kukuw bete kuw aso nu gelewkabuluw te.

8 Gelewsomi, mali kawtiw im aso nulo yemsul-
biliw ding dim bakate,

mali im aso num wiin de mit dakabiliw ding
dim bakate,

mali im aso num dulum elote ibik weng keyem-
biliw ding dim bakate,

mali im aso nulo ken sang bakayembiliw ding
dim bakate,

aso num fein weng bakabuluw kate, “Dasuw
bakam funum funum kunum ite te!”, yang-
biliw ding dim bakate,

9 mali im aso nulo akokow tew kebilw kate,
banban i aso nulo kilele kal keliw ding dim
bakate,

* 6:5: 2 Kolin 11:23-27 * 6:6: 1 Timoti 4:12

aso num kuanomin kis kebuluw kate, fein, finik
 so buluw ding dim bakate,
 mali im aso nulo yen feiw kebiluw kate, aso
 nu atin kuw kuaninba kebuluw ding dim
 bakate,*
¹⁰ aso num ibolow banban kebuluw kate,
 diwkuw diwkuw kalfongbuluw ding dim
 bakate,
 aso num em banim keko, baluw kawtiw kebu-
 luw kate, mali kunum waneng banban emso
 emdiw keyemkabuluw ding dim bakate,
 aso num atin kuw soson kebuluw kate, alik
 alik eisneng aluwkabuluw kunum waneng
 kebuluw ding dim bakate,
 fein, nu kalaing keko, diwkuw diwkuw Sunbin-
 Got em aluwbamin ete kuw aluwkabuluw te.
¹¹ Nakunum kumel Kolin abiw mutuk fian
 kunum waneng yutaka! Alik alik yom gomet
 bukesuluw kukuw be aso nu yulo kilele kukuyem-
 somi, aso nukalem ibolow mutuk be atin kuw
 fitew dim dabuluw te. ¹² Feinka! Aso nukalem
 ibolow mutuk kel e, yu dolon keko, abin so ke-
 biluw angomi, aso nu yulo ibolow mutuk fian kuw
 duyemkabuluw kate, yukalem ibolow mutuk kel
 e, aso nu dolon keko, abin banim so kebuluw
 te. ¹³ Kasike kame, yu aso num muluwel atew
 kesomeliwi, aso nu yukalem kalew atew keko,
 kitil weng mak bokoyemomeluw: “Yu aso nukati
 yukalem ibolow mutuk kel be dolon keko, abin so
 keyemboliwka!”, yangbuluw te.*

*Dasuw Got im Deiw so, Sunbin-Got em Deiw so,
 Bonggu Kolewkemin em Weng te.*

* **6:9:** 2 Kolin 4:10 * **6:13:** 1 Kolin 4:14

14 Nakunum kumel kunum waneng yutaka! Yu kanelom fein ibolow kelinba kawtiw iso bongguko, ibolow makmak kelokoliw te! Nimtew angom? Kiol kukuw so, sili sili ibolow kukuw so bonggubinba kekabiliw kasike! Beemdiw, ailbin so, kutiliw so, ikal bonggubinba kekabiliw te.*

15 Yu kilele ibolow fukunina! Kulais so, Seten-Ataanim* so, aso i ibolow makmak kesomi, kal-fong so aluwbamin makmak kuw kekabiliw sako? Bayo! Beemdiw, fein ibolow so kunum waneng so, fein ibolow kelinba kawtiw iso, ibolow makmak kelinbakabiliw te. 16 Feinka! Yu Sunbin-Got diwkuw diwkuw finik so bin Sunbin-Got em am yol yute te! Nimtew angom? E bokolomele:

“Im ibolow mutuk e nem am yol kebomaka! Keko beli, ne iso bomelii, kakamoki te.

Beli, ne im Sunbin-Got kebili, isik nem fein kunum waneng kebokoliw te!”, angse kasike. Angse kate, Sunbin-Got em am yol so, dasuw-got iso ibolow ki makmak keko, binba kekabiliw te.* 17 Kasike,

“Kamok Fian e yulo bokoyemomele: ‘Yu mali nem ibolow gelewinba kebiliw kawtiw im biliw dim koyem unoliwka!

Koyem unesomeliwi, im dim amen amen kuw keboliwka!’, yangakabe te.

Keko beli, yu kanelom Sunbin-Got nem kiin dim ninik so eisenng mak meleleweko, fewtokoko, kemokoliw te!

Keko, bomeliwi, Kamok Fian auk so kitil so

* 6:14: Efesus 5:11 * 6:15: 6:15 Gilik weng sin e, kale kel Seten-Ataanim em wiin “Belial”, angeko, be te. * 6:16: Aneng Kolew 29:45

Sunbin-Got ne yulo kalfong so nem mit mewso yemde toloki te.*

18 Yemde telesomelii, ne yom kalew keyembilii, yu nem muluwel kebokoliw te.', auk so kitil so Kamok Fian nete yangbi te.”, angse kale.*

7

1 Nakunum kumel ibolow mutuk fian duyembi kunum waneng yutaka! Yu kilele ibolow fukunina! Sunbin-Got e nulo weng fawtuk ayem fian be bokoyemse kasike kame, nukalem finik so kal anggil so be Sunbin-Got em kiin dim e ninik so keyembe eisneng alik alik be atin atin kuw koleweko, elo wangweng kelewsemi, akalem gal-mose em afak kuw kunum waneng emdiw keko, kakamuma!

Fol em Kalfong Kuluse Sang te.

2 Nakunum kumel kunum waneng yutaka! Yukalem ibolow mutuk kel e, aso nulo dolon keko, abin so keyembina! Nimtew angom? Feinka! Aso nu mali kunum waneng mak ilo wa keyem-somi, mali yeneko, kalak da koyemsemi, mali funum funum keyemeko, im on kisol kulinba kesuluw kasike. 3 Yutaka! Yulo geeyemomin beem mongom ete weng kale bokoyeminba kebi kate, suaem akalem bokoyemkabi weng akate kame iti bakayembite: Aso nu yom ibolow fukuneko, “Yom gomet em dulum elote finik so buluw dim

* **6:17:** Aisaya 52:11; Fitew Dase 18:4 * **6:18:** 2 Samuel 7:14; Selemaya 31:9

yake, mani kuanbuluw dim yake!”, angeko, di-wkuw yuso fewtokoko, buluw te. Feinka! Yu aso nukalem ibolow mutuk kel dolon keko, abin so biliw kasike. ⁴ Keko beli, ne kalaing kuw keko, yulo kaim dim weng kuw bakayemkabi te. Feinka! Ne yom ibolow fukuneko, yulo yemsul-bomi, menew ibolow so keyembi kasike, kal ilum ding kebe ding kame, kalfong fian ete kuw alik num ibolow mutuk wenkabe te.

⁵ Nakunum kumel kunum waneng yutaka! Num Masedonia aneng fian talsuluw ding dim kabalak e, nu finengdalinba kesuluw te. Nimtew angom? Sakik ilum banban keyemei, kal ilum fian nulo kalak da koyemei, nu finganin fian kulusomeluwi, ibolow tiaktiak kesuluw kasike.*

⁶⁻⁷ Num ibolow banban kesuluw ding kabalak e, menew ibolow keyembe Sunbin-Got e nulo dokoyemei, iti kalaing ibolow duyemse te. Nimtew angom? Taitus e yom dulum koyemeko, num fukun teleko, “Kolin abiw mutuk fian kunum waneng i nelo kalaing kuw kenemsiliw te!”, yangse kasike. E nulo yom kanebiliw kukuw be bokoyemomele: “I Fol elo atemomin ibolow fian kesomi, wa kukuw kesiliw em mongom ete ‘Kaite te! Eke! Kanesuluw o!’, angesomi, ‘Wa kukuw Fol elo kukulewsuluw be iti kileluma o!’, ange ange kesiliw te.”, yangese te.

⁸⁻⁹ Keko kasike, sukum ding kelei, ne yom dim dabalayemsi fut beem kal ilum duyemse beem dulum elote sakik kulusi te. Kate kame, nem sakik be banimei, ne kalfong so bi te. Ne yom sakik ilum beem dulum kalfonginba kebi kate, yom

* 7:5: 2 Kolin 2:13

fut teing bokoko, sukum ding sakik so kal ilum kulusiliw beem mongom ete yu “Eke!”, angeko, yom kakamin deiw alwol kebiw beem mongom ete kuw ne kalfong so kebi te. Feinka! Yom sakik ilum kulusiliw ilum be Sunbin-Got em ibolow ki kelewse kasike, sakik be yulo dokoyemei, num fut beem weng e yulo wa keyeminba kese te.*

¹⁰ Nimtew angom? Sunbin-Got em ibolow ki kelewe sakik kal ilum e kawtiw nulo fein kal ilum duyeminba kebe kate, sakik ilum beem mongom e kanekote: Kunum waneng nu num sili sili ibolow beem dulum elote sakik kuluko, “Eke!”, angeko, num kuankemin kakamuw deiw kolewsomeluwi, e nulo finik so kulomin deiw kel mo koyemkabe kasike. Kate, kawin dim kaleem duyembe sakik ilum e kawtiw nulo kuankemin em deiw ete kuw koyemkabe te.* ¹¹ Yu Sunbin-Got em ibolow ki kelewe sakik ilum yom mutuk dim kel kitil aluwbabe beem dem e kilele atebamoliwka! Aluwbamin beem dem e kanekote:

Yom fein ibolow e iti kitil kuw kelei,
 yom sili sili kukuw koleweko, kiol kuw kakabiliw kukuw e alik im kiin dim kilele fitew-someliwi,
 yu sili sili kukuw elo digaka kelewsomi,
 “Nu kanelom beem kukuw iti kelokoluw te!”,
 angeko, finganeko,
 bokolomeliw: “Nu Sunbin-Got em kiin dim e kiol kuw kukuw kebuma!”, angeko, beem kukuw kuw ibolow fulut fulut angbomi,
 kukuw be kitil kuw gelewbomeliwi,
 wa kekabiliw kawtiw ilo ilum duyemeko, im

* **7:8-9:** 2 Kolin 2:4 * **7:10:** Matyu 27:3-5; Kibulu 12:16-17

kukuw “Alwol kelina!”, angomi, kilelyemkabiliw te.

Feinka! Yom kiol kuw kebiliw kukuw be kawtiw alik alik im kiin dim e kilele fitewkabe te.

¹² Nakunum kumel kunum waneng yutaka! Sili sili kukuw keyemsiliw kawtiw im dulum o, ken bisiliw kawtiw im dulum o, “Ite kuw!”, angomi, fut be bolinba kesi te. Bayo. Kate, nem fut bosu ding kabalak e, nem ibolow fukunin fian e kanekote: “Yom dulum aso num dulum em ilum kebe be banimoka!”, angesomelii, “Sunbin-Got em kiin dim e yukalem aso nulo ibolow mutuk fian duyembiliw kukuw e kaim dim kuw keloke kae!”, angeko, fut be bosu te. ¹³ Nakunum kumel kunum waneng yutaka! Aso nu Taitus em kalan weng bokoyemse weng be kilele kiliko, iti kalaing kuw kulusuluw te. Kulusomeluwi, aso nu yom ken kukuw Taitus elo kukulewsiliw kukuw em sang kilisomeluwi, Taitus em beem mongom kalfong fian kuluse kakat atemeko, aso nukati kalfong fian kuw kulusuluw te. Nimtew angom? Yu elo ibolow menew kelewsiliw kasike.

¹⁴ Feinka! Sua e, aso nu Taitus elo yom fein ken ati sang kuw bokolewsomeluwi, aso nu yulo em kiin dim kel yemsulkabuluw te. Kanelewsiliw beem mongom ete yu aso num elo bakalewbuluw yemsulemin weng be fein dem so weng kelewsiliw te. ¹⁵ Em yom fukun talse ding kabalak e, yu wangweng fian keleweko, em weng kilele gelewsomeliwi, elo yom mutuk dim kel kulusiliw kasike kame, akalem beem ding ibolow fukunse ding dim bakate, e yulo ibolow mutuk fian kuw duyemkabe te. ¹⁶ Kasike kame, nakati yom ibolow

fukunite: “I ken kukuw em deiw ete kuw gelewkwabiliw kai!”, angeko, kakat fian kuw kekabi te.

8

On Kisol Dukalebin em Weng te.

¹ Nakunum kumel kunum waneng yutaka! Yu Sunbin-Got em ibolow folok Masedonia aneng fian kel biliw im sios kunum waneng ilo kukuyemse beem sang be kilisomi, kal keloliwka!*

² I kal ilum fian kulusiliw kate, im mesesem banim kesomi, atin kuw baluw kebiliw ding kabalak e, i kalfong fian kesomi, on kisol banban bongguko, mali ilo dokoyemomin ibolow fian kesiliw te.

³ Kebiliw angomi, ne kilele yetemite: I ikalem ibolow kuw gelewoko, ikalem sukum biliw bakate, on kisol banban kuw bongguko, num teing dim dayemsiliw te.

⁴ Dayemsomeliwi, i nulo kitil weng bokoyemomeliw: “Nu Sunbin-Got akalem wiin so galmose kunum waneng im sukum biliw eisneng beem dulum elote bonggusomi, ibolow folok kukuw kukuyemsomi, ilo dokoyemuma!”, ange ange kesiliw te.

⁵ Kesomeliwi, im dakayemin kukuw e atin kuw fian kese kasike, i emisik e ikalem finik so bin so, alik alik eisneng beso, Kamok Fian elo dulewsomeliwi, ibik e, Sunbin-Got em ibolow fukunin gelewoko, ikalem ite aso nulo akal duyemsiliw te.

⁶ Keko beli, aso nu Taitus elo kitil weng bokolewomeluw: “Ku iti Kolin abiw mutuk fian elo uneko, kom suaem on kisol bongguko, mali dakayembin aluwbamin kilselew be kame banim

* **8:1:** Ulom 15:26; 2 Kolin 9:1-2

kela!”, dangsuluw te. ⁷ Kame yu kilele kililina! Yom mutuk tem e kalakaneko kukuw bakate fian kuw kebete:

Fein ibolow e,
 ken abal weng e,
 ken kal fukunin e,
 Sunbin-Got em aluwbamin ibolow fian kelew-
 bin e,
 num aluwbamin beem dem em yom ibolow
 mutuk dim kel gilalewbe ibolow mutuk fian
 bete te.

Feinka! Yom kukuw be mali kawtiw ban-
 ban im kukuw beelo bakilewkabe kasike kame,
 yom on kisol bongguko, mali ilo dakayembin
 kukuw bakati mali im kukuw bakiyemeko, fian
 kemomaka!* ⁸ Nakunum kumel kunum wa-
 neng yutaka! Ne kitil keko, “Yu nem weng be
 geleweco, kelina!”, yanginba kebi kate, ne mali
 biim kanebiliw ken kukuw beso, yom ibolow
 mutuk aso nulo kukuyembiliw beem dem beso,
 diweco, “Ki bani ba?”, angomi, kal kelomin beem
 mongom ete bakayembi te. ⁹ Nimtew angom?
 Yu nukalem Kamok Fian Yesus Kulais em yulo
 kukuyemse ibolow folok akal kal kebiliw kasike.
 E mesesem banso emso kekabe kate, yom gomet
 fukuneko, alwol keko, em banim baluw kunum
 atew kese te. Kanese beem dem e, e yulo emso
 kawtiw keyemse te.*

¹⁰ Kame nakalem yulo dokoyemoke ibolow
 fukunin kuw bakayembite: Itol makmak miyak
 banimse ding dim kabalak e, yu kitil kuw
 keko, “On kisol bonggumuma!”, angsiliw kasike

* **8:7:** 1 Kolin 16:1-2 * **8:9:** Matyu 8:20; Filibai 2:6-7

kameem ding dim bakate, ¹¹ suaem kitil kesomi, “Kaneluma!”, angsiluw beemdiw kilsiliw aluwbamin be kame fein ki banim keloliwka! Kate, mali yukalem on kisol banban kebe yake, fong gel kebe yake, be yukalem ete diw atemeko, bongguko, dukuloliwka! ¹² Nimtew angom? Sunbin-Got e mali num kalfongeko, “Elo duluma o!”, angbuluw kukuw ete kuw atemeko, kalfong kelew kabe kasike. Feinka! Mali on kisol fian aluwkabuluw kunum waneng im “Fian dulewuma o!”, angeko, fein gelew kabiluw kukuw so, fong gel aluw kabiluw kunum waneng im “Fong gel kuw dulewuma!”, angeko, akati gelew kabiluw kukuw beso, alew kukuw beelo kalfong kuw keko, fein kulukabe te.*

¹³⁻¹⁴ Yu kililina! Nem bokoyemi weng beem dulum elote “Mali i yom on kisol kuluko, emso kebiw kate, yu kal ilum kelokoliw te!”, anginba keli kate, nem ibolow fukunin e kanekote: Kameem ding dim bakate, yu mesesem eisneng banso kebiw kasike, yu mali sukumeko, kal ilum so biliw kawtiw ilo dokoyemina! Keko beli, sow esik yu mesesem sukumiw tewe, isik yukati dokoyemokoliw kasike. Beemdiw kanelew kanelew kesomi, yukalem dokolew dokolew kukuw gelewemoliwka! ¹⁵ Yu Sunbin-Got em fut tem em weng ibolow fukunina! Isalael kawtiw im mana belet kubulsiliw beem dulum i boko, bokolomeliw:

“Nimin kunum waneng ite mak banban kubuliw tewe,

* **8:12:** Mak 12:43-44

i alikum waneko, kumun ki kesomi, wanin
 banim kesiliw te.
 Kesomeliwi, nimin kunum waneng ite mak
 fong gel kuw kubuliw tewe,
 alikum waneko, ikati kumun ki kesiliw te.”*

Alemsal Kunum mak Yemdasiliw em Weng te.

¹⁶ Nakunum kumel kunum waneng yutaka! Sunbin-Got e Taitus em ibolow silikmolewei, e aso Fol so, Timoti so, numdiw keko, “Yulo dokoyemo yo!”, angse kasike, aso nu Sunbin-Got elo “Weso! Seyo!”, angbuluw te. ¹⁷ Aso num elo bokolewomeluw: “Ku Kolin abiw mutuk fian elo una!”, angbuluw weng so, akalem “Ilo yetebam uno yo!”, ange ibolow fukunin so, weng alew bi ki makmak keliw kasike, e kitil keko, “Fongate im fukun uno yo!”, angse te. ¹⁸ Angei, aso nu sios kunum waneng im kiin dim e wiin so kebomi, Sunbin-Got em Weng Kal Ken Ati bakayem tem bakayem tem kekabe kunum mak Taitus eso dabalaluw te. ¹⁹ Sios kunum waneng ikati kunum beelo ikalem wiin so amkosiliw kasike, e on kisol bonggu duliwi, de unomin beem mongom ete nuso makuw kabe te. Kanebe bete, Sunbin-Got e wiin fian kuloke te. Kulei, mali kawtiw i num wiin mit da koyeminba kelokoliw te. ²⁰ Nimtew angom? Mali kawtiw mak i bokolomeliw: “Fol e on kisol banban be kulusomi, anung yakut kebe kae!”, angeko, nam angiw te! ²¹ Fein! Num ibolow fian e kanekote: Nu Sunbin-Got em kiin dim e, kunum waneng im kiin dim e, alik alik im kiin dim e kiol kuw kukuw ke alakabuluw te.

* **8:15:** Aneng Kolew 16:18

²² Keko beli, nu kunum diwkuw fein kitil kuw aluwkabe kunum makso mak Taitus aso iso, dabalaluw te. Fein ibolow so kunum be yom kanebiliw sang be kiliko, “Kolin kawtiw i ken kuw kawtiw ite te!”, angeko, yulo yetemeko, dokoye-momin ibolow fian kekabe te.

²³ Kunum alemsal biim dulum elote weng kal fong gel mak bokoyemite: Taitus e nem fang-fangda kunum kesomi, yom kiin dim kel neso makuw aluwkabe kunum ete te. Eso kakabiliw kunum alew bi Kulais em kiin dim e wiin fian so kunum kesomeliwi, sios kunum waneng kalim kalan weng de teliw bakate. ²⁴ Kasike kame, alik alik sios kunum waneng im kiin dim e yom ibolow mutuk duyembiliw kukuw bakate kilele kaim dim dasomi, alemsal kunum biilo ken kukuw kuw kukuyemiwi, i kilele atemeko, bokolomeliw: “Fol em Kolin sios kunum waneng im wiin yemsulse weng e fein weng kae!”, angeko, atemokoliw te.*

9

On Kisol Dukayembin Dem em Weng te.

¹ Nakunum kumel kunum waneng yutaka! Yu on kisol bongguko, Sunbin-Got akalem galmose kunum waneng ilo dakayemin em kukuw be alik alik kilele kal keliw kasike, ne weng makso boko, yulo nam dabalayemi te.* ² Ne kilele kal kelite: Yu kitil kesomi, beem kukuw ibolow fian kebiliw kasike, ne diwkuw yom wiin Masedonia aneng fian kale kel yemsulbomi, bokoyemomeli: “Itol makmak miyak kel e, Kolin abiw mutuk fian

* **8:24:** 2 Kolin 7:13-14 * **9:1:** 2 Kolin 8:1-7

kunum waneng i on kisol bonggu kilsiliw te!”, yangakabi te. Yangbilibi, i kilisomi, yom sang beem dulum elote mali kunum waneng banban ikati kitil kesomi, “Kame akal on kisol bongguko, duyemuma!”, angakabiliw te. ³ Angakabiliw kasike, “I on kisol eisneng be memen kelewbiliwi, nem yemsulsi weng be fein keloka!”, anghi beem mongom ete ne kunum alemsal bi imisik yemdali te. Nimtew angom? Ne yom wiin daoko, bokoyemomeli: “I alik eisneng memen kesiliw te!”, yangsi kasike. ⁴ Fein! Mesik esik nem mali Masedonia aneng fian kunum waneng iso yom fukun toloki ding kabalak e, nu yetemom ete: “Ebe! I memen kelinba kebilw kae!”, angesomi, yuso nuso “Nu kame inkal fian mak kulokoluw kai!”, angomi, ⁵ nu kitil keko, mali kunum biilo imisik yemdalsuluw bakate. Keko beli, fein ibolow so kunum bi yom sua kel “Nu mali ilo bamki on kisol mak memen keyemokoluw te!”, angenaliw weng be fein dem so kelewoliwka! Kelewsomeliwi, yom bonggusiliw on kisol beem dim e yu kanelom “Fol em kiin dim e banso banso dukuluma!”, angeko, ibolow ilum so dukayembokoliw te! Kate, yu fein kalfong so keko, dukayemboliwka!

⁶ Yu kilele ibolow fukunina! Nimin kunum waneng ite mak wanin fong gel kuw kailiw tewe, i bakalem ki kuw kulukabiliw te. Beemdiw, nimin kunum waneng ite mak kiin abilsomi, wanin fian kuw kailiw tewe, i bakalem ki kuw keko, fian kuw kulukabiliw te.* ⁷ Beemdiw, yu kanelom ibolow alew keko, mali im kiin awan fukuneko, “Ebo! I nelo kilele netembiliw kasike, ne im kiin

* **9:6:** Ken Abin 11:24-25

dim e fian dulo yo!”), ange ange kemokoliw te! Babo! Kate, alik alik yu yukalem ibolow fukunin kuw geleweko, on kisol mesesem Sunbin-Got elo dukalewboliwka! Nimtew angom? Sunbin-Got e kunum waneng ibolow kalfong so keko, dukayembiliw kunum waneng ilo ibolow mutuk fian duyemkabe kasike. ⁸ Feinka! Sunbin-Got e yulo bamki fian duyemsomi, yulo tulun beki kuw keyemkabe te. Keyemei, yu diwkuw diwkuw banban ki kesomi, yusik mali ilo dokoyemeko, aluwbamin ken ati kuw be keemboliwka! ⁹ Beem dulum elote Sunbin-Got em fut tem e weng kale bokolomele:

“Teing kalikali kunum waneng i on kisol e teing waleleko, em banim sukum kebiliw kawtiw ilo teing kalikali so keyemiwe tewe, im ken kiol kuw kukuw gelewkbiliw kukuw beem dem e nam banime te.”,

ange kale.* ¹⁰ Feinka! Sunbin-Got e wanin beem kailomin sen so dem so duyemsomi, yemen soul akal duyemkabe te. Duyemsomelei, wanin beem sen so dem so bamki kelewei, e fukalalei, yu ki keko, yom teing kalikali dakayemin kukuw be beki kuw kemoke te.* ¹¹ Keko beli, em yulo bamki duyemoke beem mongom ete yu ki keko, mali ilo teing kalikali gelemn kukuw keyemboliwka! Keyembomi, yom on kisol banban num teing dim daliw on kisol be mali ilo dokoyemoke kasike, i Sunbin-Got elo “Weso! Seyo!”, dangbokoliw te.* ¹² Keko kasike, yom dokoyemeko, ibolow mutuk fian kukuyembiliw beem mongom ete yu

* **9:9:** Sim Fut 112:9 * **9:10:** Aisaya 55:10 * **9:11:** 2 Kolin 1:11; 4:15

Sunbin-Got akalem galmose kunum waneng im sukum kebiw eisneng be ki koyemsomeliwi, i kalfong kuluko, Sunbin-Got elo “Weso! Seyo!”, dangbokoliw te. ¹³ Feinka! Yom Kulais em Weng Kal Ken Ati beelo “Fein!”, dangbiliw beem dem e yu teing kalikali gelem kukuw be gelewbiw kasike, kunum waneng alik alik i yom kukuw be atemeko, Sunbin-Got em wiin fian daolewkabiliw te. ¹⁴ Daolewsomeliwi, i Sunbin-Got em yulo kukuyembe alik alik bakilewkabe ibolow folok beelo ibolow fukuneko, yulo ibolow mutuk fian duyemsemi, Sunbin-Got eso bokoleweko, yom dulum elo “Ku ilo bamki keyema o!”, angeko, bokolewkabiliw te.

¹⁵ Nakunum kumel kunum waneng yutaka! Mali ilo on kisol dukayemin beem dulum elote nu diwkuw diwkuw nukalem Sunbin-Got em kaim dim kuw duyemse alik alik bakilewkabe ibolow folok beelo fukuneko, “Weso! Seyo!”, dangakabuluw te!

Fol e Sunbin-Got em Fein Kalan Kunum ete te.

10

Fol elo Weng Milewsiliw em Yan Weng te.

¹ Nakunum kumel kunum waneng yutaka! Mali kawtiw mak i weng mak minemeko, bokolomeliw: “Fol em nuso bise ding dim bakate, e falit angeko, menew weng bakabise kate kame, singam kel be ding dim e, e kalaing keko, kitil weng kuw bokoyemkabe kai!”, ange ange kekabiliw te. Kate kame, ne Kulais em menew falit kukuw gelewkebe beemdiw keko, yulo kitil

weng mak dakalako, bokoyemomeli.* ² Mali im desi weng bokonemeko, “Fol e kawin dim kaleem kukuw geleweko, aluwkabe kai!”, nangakabiliw kawtiw biim weng be yu kililina! Mesik esik nem toloki ding dim kabalak e, ne kalaing keko, kitil weng fian mak bokoyemoki kasike!* ³ Nimtew angom? Nu kawin dim kaleem kukuw atew geleweko, ganbuluw kate, nu kawin dim kaleem kawtiw imdiw kelinba kekabuluw te. ⁴ Babo! Nukalem ganbin beem on balam e kawin dim kaleem kawtiw biimdiw bate. Kate, nu Sunbin-Got em auk so kitil so on balam be aluwko, ki kebomi, maka im askom ow deng dakalas kolewokoluw te. Dakalas kolewsomeluwi, nu mali kawtiw im ibolow fukunin e,* ⁵ mali im “Nu kal fian so kebuluw kae!”, angeko, Sunbin-Got elo kilele dolon kelomin deiw desi kelewabiliw kawtiw biim weng bakati dakalas kolewkabuluw te. Dakalas kolewsomeluwi, mali kawtiw biim ibolow fukunin alik alik be sok emdiw eingge koyemeko, Kulais em weng afak da koyemkabuluw te. ⁶ Keko beli, aso nu kame Kolin abiw mutuk fian beem sios kunum waneng yom ding fenbuluw te. Yom atin kuw Kulais em weng afak bokoliw ding kabalak e, nukati fein kitil keko, mali sakalaw keko, weng bo bo kebiliw kawtiw biilo geeyemokoluw te.

⁷ Nakunum kumel kunum waneng yutaka! Yu kanelom nem aluwkakawkabi be kal dim ete kuw diw atebamokoluw te! Babo! Kate, nimin kunum waneng ite mak “Nu Kulais em angin nute te!”, angiw tewe, i iti kilele ibolow fukuneko, atemi-

* **10:1:** 1 Kolin 2:3 * **10:2:** 1 Kolin 4:21 * **10:4:** Efesus 6:13-17

wete: Aso nukati biimdiw Kulais em angin kebuluw kasike! ⁸ Feinka! Yulo de mit da koyemomin beem dulum elote bate. Kate, yulo kitil kuw mo koyemomin beem dulum elote kuw Sunbin-Got e aso nulo auk so wiin so keyemeko, yom kak kunum keyemse te. Fein! Yu num weng kale kiliko, “Yake! I ikalem wiin fian dawsulkabiliw kai!”, yangbiliw kate, nu funum keko, nukalem wiin daolewinba kebuluw kasike, yu kanelom nem wiin de mit da konemokoliw te!*

⁹⁻¹⁰ Nakunum kumel kunum waneng yutaka! Mali kawtiw i bokolomeliw: “Fol em mali fut boko, nulo dabalayemse fut e weng ilum fisi faso angeko, bakayemse kate, em nuso be ding dim bakate, e falit angeko, weng teifulubin weng kuw bakayemkabe kai!”, ange ange kekabiliw kate, ne mali yulo boyemsi fut kale boko, “Yulo finganin weng mak duyemo yo!”, anginba keko, dabalayemsi te. ¹¹ Keko beli, mali kanekabiliw weng be bakabiliw kawtiw yu kilelbi boliwka! Aso num yom fukun tolokoluw ding kabalak e, aso nu num fut weng ilum kaim fisi faso angeko, bosuluw weng bakati kilele gelewokoluw kasike.

¹² Nakunum kumel kunum waneng yutaka! Mali ibolow benemin kawtiw i yom mutuk telesomi, ikalem ete dawsule dawsule keko, ikalem ete daoyemkabiliw te. Daoyemsomi, i ikalem kukuw so, mali im kukuw so diw yetemeko, “Nute ilo bakiyemuw kai!”, ange ange kekabiliw te. Keko kasike, ne kunum ken kate, kalaing keko, “Ne ken kawtiw biimdiw kebi kai!”, anginba keli te. ¹³ Babo! Kate Sunbin-Got e aso nulo

* **10:8:** 2 Kolin 13:10

akalem aluwbamin be duyemei, aso nu bukeko, aluwbamin beelo ki keleweko, yom kawin akal talsuluw te. Telesomelwui, aso nu Sunbin-Got em nulo beem mongom ete wiin fian duyembe wiin beelo bakilewoko, kawtem kawtem uneko, “Aso num wiin e atin kuw fian te!”, angeko, nam anguw te.* ¹⁴ Feinka! Yom biliw aneng be Sunbin-Got e aso num teing dim dukulei, aso numisik keko, Kulais em Weng Kal Ken Ati be yulo kilele kukuyemeko, bokoyemsuluw kasike, aso nu Sunbin-Got em beem mongom ete aso nulo wiin fian duyembe wiin beelo iti bakilew kebomi, aso nukalem wiin e yom dulum elote iti makso makso dawsulinba kebuluw te. Babo! ¹⁵ Beemdiw, aso nu mali kawtiw im bukeko, aluwbamin beem dulum elote “Aso nukalem ete aluwsuluw te!”, angeko, nukalem wiin daolinba kebuluw te. Feinka! Aso num ibolow tem e “Aso nu wiin fian kuluma o!”, anginba kebuluw kate, “Akalem aluwbamin em dulum elote e aso nulo bokoyemomele: ‘Kaso yu biim mutuk kel aluwbina!’, yangse te. Yangse kasike, aso nu bukeko, yom mutuk kel aluwbamin be fian kesomeluwi, yom fein ibolow e kitil kuw keboka!”, angeko, ibolow kelewsomi, kaneloke beem ding fenbuluw te. ¹⁶ Ding fensomeluwi, aso nu mali kawtiw im bukeko, aluwsiliw beem mongom ete “Aso nu wiin so kunum nute te!”, anginba kebuluw kasike, aso nu mali kawtiw im ka uninba aneng elo “Aso nu yom dulum bakilewoko, singam aneng elo uneko, Kulais em Weng Kal Ken Ati be bakayem tem bakayem tem kakamuma!”, angeko

* **10:13:** Ulom 12:3

angomi, aso nukalem aluwbuluw beem dulum elote kuw wiin fian so kulukabuluw te. ¹⁷ Kate, alikum nu kilelbiko, boluwka! Nimtew angom? Sunbin-Got em fut tem e bokolomele:

“Nimin kawtiw ite mak ‘Dawsuluma!’, angiw tewe,
i Kamok Fian em wiin ete kuw dawsulemoliwka!”

angbe kasike.* ¹⁸ Nimtew angom? Mali ikalem wiin dawsulkabiliw kawtiw mak fein wiin so kawtiw kelinba kebilw kate, kunum waneng biim dulum elote Sunbin-Got ete bokolomele: “Ite kiol kuw kukuw keko, nem weng gelewkbiliw kunum waneng ite te.”, yangakabe kawtiw ite kuw fein wiin so kunum waneng kekabiliw kasike.*

11

Dasuw Kalan Kunum im Sang te.

¹ Nakunum kumel kunum waneng yutaka! Yu nelu “E ibolow benemin kunum te!”, nangbiliw kate kame, yu ibolow menew keko, nem weng kale kililina! ² Feinka! Sua e, nu yom fukun teleko, Kulais em Weng Kal Ken Ati be yulo kilele kukuyemsomi, yulo wangweng waneng seiw mak kunum kulomin waneng umdiw Kulais em dulum memen keyemsuluw te. Memen keyemsuluw kasike kame, ne Sunbin-Got em ibolow fukunin gelewko, kitil kesomi, “Yu kanelom wangweng kukuw be kolewko, deiwkim waneng im kukuw imdiw kemokoliw te!”, yangakabi te.* ³ Nimtew

* **10:17:** Selemaya 9:24; 1 Kolin 1:31

* **10:18:** 1 Kolin 4:4

* **11:2:** Efesus 5:26-27

angom? Ne finganeko, ibolow fukunomeli: “Mesik esik suaem Iw ulo kak keumse sokyan beem funum funum weng keumse emdiw yukati kaneyemome o!”, angbi kasike. Keyeme tewe, yu wangweng seiw buum ken kukuw kolew-somi, ibolow teifuluko, kimok Kulais em dim kuw fewtokoko, ibolow fian kelewabiliw kukuw be kolokoluw te.* ⁴ Feinka! Aso nu yom dim kanebiliw beem awan finganbuluw te. Nimtew angom? Nimin kawtiw ite mak teleko, yulo funum funum abal weng mak bokoyemiw tewe, yu kalfong kuw keko, im yangbiliw weng be sak ete kuw kiliko, fongate “Fein!”, dangbiliw kasike. Kate, yu kilele ibolow fukunina!

Im “Yesus” bokoyemsiliw sang e, num bokoyemsuluw “Yesus” sang e amen kelei, im “Finik mak kulina!”, yangiwbiliw weng beem finik e yom Sunbin-Finik kulusiliw ki ba keko, amen kelei, im weng kal ken bakayemkabiliw em sang e aso num yulo kukuyemsuluw Weng Kal Ken Ati bakati amen kebe te.*

⁵ Kate, yu kilele ibolow fukunina! Ne mali kawtiw i yulo abal weng mak bakabiliwi, yu ilo yemsuleko, “Mali ilo bakiyemkabiliw kalan kunum yute te!”, yangbiliw kunum biim afak binba kebi te.* ⁶ Fein! Kawtiw im kiin dim e abal weng bakamin em kukuyemin kunum mak nelo kilele kukuneminba kese kasike, nem weng e mali kawtiw biim weng abal emdiw bate. Kate, nem aluwbamin yom kiin dim kel

* **11:3:** Talfut Kese 3:4,13 * **11:4:** Galesia 1:8-9 * **11:5:** 1 Kolin 15:10; 2 Kolin 12:11

aluwkakawkabi be yulo kilele dolon keyemete: Kal fian so kukuyemin mak nelo kal fian dune-meko, kukunemse te.*

⁷ Nakunum kumel kunum waneng yu kilele ibolow fukunina! Sua e, num yom fukun talsuluw ding kabalak e, nu falit angeko, yulo wangweng kukuw kuw kukuyemeko, sak misim kuw Sunbin-Got em Weng Kal Ken Ati be bakayemkakawkabuluw te. Bokoyemsomi, nu yulo sili sili kukuw fian keyemsuluw sako?*

⁸ Kate feinka! Mali aneng aneng im sios kunum waneng i nelo yom gomet em dulum elote on kisol dunemiwi, ne beelo yakut emdiw kuluko, yom dulum kel beso misim kuw aluwkakawkabi te.*

⁹ Aluwsomelii, eisenng mak sukum kebisi em ding kabalak e, “Yu nelo dokonemina!”, yangomi, ilum duyeminba kekakawkabi kate, Masedonia aneng fian kolewsiliw fein ibolow so kunum waneng ite kuw nelo dokonemkakawkabiliw te. Kame yu kilele kililina! Sua emdiw kame akal, ne “Yu on kisol so dokonemina!”, angeko, yulo ilum mak duyeminba kekabi te.

¹⁰ Kanekabi kukuw beem dulum elote ne wiin so kunum kebomi, Kulais em atin kuw fein kukuw e nem mutuk tem aluwbe kasike, mali Akaia aneng fian em kasel i nelo nam kalak da konem kemiw te.

¹¹ Kate yu kilele ibolow fukunina! Ne yulo ibolow mutuk fian kuw dukayembi kasike, ne yom dakanembiliw eisenng mak “Nam kulo yo!”, yangeko, ilum mak duyeminba kebi te. Feinka! Sunbin-Got e

* **11:6:** 1 Kolin 2:1,13 * **11:7:** 1 Kolin 9:18 * **11:8:** 2 Kolin 12:13; Filibai 4:15-16

kilele kal keko, atemete: Feinka! Ne yulo ibolow mutuk fian keyembi te!

¹² Keko beli, ne suaem kanesi kukuw be iti gelewsomi, sak misim kuw Sunbin-Got em Weng Kal Ken Ati be bakayem tem bakayem tem kak-abomi, aluweko, kait bi te. Mesik esik mali dasuw kawtiw i teleko, kalan kunum numdiw kesomi, ikalem sul so weng e “Nu Fol emdiw keko, bakayem tem bakayem tem kekabuluw kai!”, angbiliw weng be fein dem so keloke kasike.

¹³ Nimtew angom? Fimdi famde kawtiw bi Kulais em fein kalan kunum atew kesomi, fein so funum so aluwkabiliw kawtiw kebiliw kasike. ¹⁴ Feinka! I Seten-Ataanim emdiw kekabiliw kasike, nu kanelom im kukuw atemeko, yol angokoluw te! Nimtew angom? Seten-Ataanim akati findi famde finik kebomi, Sunbin-Got em dabalakamin finik im kukuw atew kebomelei, ailbin so fitewkabe kasike. ¹⁵ Keko beli, Seten-Ataanim em weng afak biliw kawtiw bi ikalem kak kunum emdiw keko, fein so funum so kebomi, kiol kuw kukuw gelewkbiliw kawtiw imdiw kebiliw tewe, alik nu kanelom yol angokoluw te! Kate, bi ete, i ikalem kukuw gelewkbiliw beem yan wa mak fein kulokoluw te.

Fol em Kal Ilum Kuluse em Sang te.

¹⁶ Nakunum kumel kunum waneng yutaka! Yu kanelom nelo “E ibolow benemin kunum te!”, nangbokoliw te! Kate, nangbiliw tewe, bakal kenka. Yu nangina! Nimtew angom? Ne kame iti nakalem sulkabi weng makso mak bokoyembi kasike. ¹⁷ Ne kame Kamok Fian em fukunin gelewinda kelomi, nakalem wiin daolewbi

kunum kebi te. Fein! Ne ibolow teifulubin kunum emdiw keko, ¹⁸ mali kawin dim kaleem kukuw gelewkbiliw kawtiw imdiw kebomi, kanekakawkabi beem mongom ete nakalem sul so kebi te. ¹⁹ Nimtew angom? Yu kal fian kunum waneng imdiw kesomi, ibolow goluw weng bakabiliw kawtiw im weng wosuko, ibolow fian kelewkbiliw kasike. ²⁰ Kelewsomeliwi, mali kawtiw mak teleko, yulo im sak weng afak kawtiw keyemsomi, yom kebe eisneng beelo “Sak duyemina! Duyemina!”, yangeko, kulusomi, yulo funum funum keyemeko, abil tem emdiw da koyemsomi, ikalem sul so kesomi, kak kunum imdiw keko, yulo desi ke koyemeko, yen feiwiw tewe, yu im kukuw kukuyembiliw be kalfong so keyemeko, “Kenka. Kika!”, yangakabiliw te. ²¹ Eke, kate aso nu yulo wa keyemsuluw sako? Nimtew angom? Aso nu ibolow falit kuw angeko, kawtiw biim kaneyembiliw kukuw beemdiw yulo kukuyeminba kebuluw kasike.

Kate kame, nakati ikalem wiin daoyemeko, ibolow galuw kawtiw imdiw kesomi, nakalem sul so kebi weng mak bokoyemoki te. Yu kililina!* ²² Mali kawtiw bi bokolomeliw: “Nu Kibulu kawtiw nute te! Nu Isael kawtiw nute te! Nu Abalakam em muluwel dow nute te!”, angiw tewe, nakati ki keko, im weng angbiliw be ki keloki te. ²³ Kebomelij, i “Nu Kulais em weng afak keko, em aluwbamin aluwkabaluw kawtiw nute kai!”, angbiw tewe, ne im ibolow kau angbiliw weng beelo bakileweko, bokolomeli: “Nem bukeko, aluwkabi aluwbamin e im kanek-

* **11:21:** Filibai 3:5

abiliw be atin kuw afak mit da kolewkabe kai.”, angakabi te. Nimtew angom? Banban tulun ding kele ding dim bakate,

mali maka kenemsiliw kawtiw i nelo sok am da konemsomeliwi,

i nelo nen feiwiliwi,

ne im teing dim e kuanomin kis kesi kasike.*

²⁴ Teingabi kel ding kabalak e, Suda kawtiw i nelo 39 ding* sok so debet so bitit butut kenemeko, nen feiwsomeliwi,*

²⁵ alemisal ding kabalak e, Ulom abiw mutuk fian im wonuk so kunum i nelo kaung debet so bitit butut nen feiw konemsomeliwi, makmak ding kabalak e, Suda kawtiw i nelo tum so aluwi, “Kuanoka!”, nangeko, neniwi, ne kuanomin kis kesi te.

Nemésiw tem kakawkabi ding kabalak e, alemisal ding kelei, siw be dakaleko, mitse te.

Kanese dim kele ding makmak e, ne mililiw duku, taw duku kelomi, okmun sel beem tikin dim kel bomi, teifulubisi te.*

²⁶ Nem aluwbamin gelewbomi, kakawkabi ding kabalak e, ding banso ding dim bakate, eisneng kanekote maka kenemsete:

Ok bang dikesi ding dim bakate, ok e nenomin kis kenemse te.

Yenomin kawtiw i teleko, yakut kenemsiliw te.

* **11:23:** Kalan Kunum 16:23 * **11:24:** 11:24 Sawa Weng 25:3 e yen feiwemin em awet e 40 ding kekabe te. Mesik esik geeyemin kunum i Sunbin-Got em sawa weng be bakilewiw tewe, Suda kawtiw im kak yetebiliw kunum i teing bakamin makmak koleweko, 39 ding kuw mali ilo yen feiwkabiliw kasike. * **11:24:** Sawa Weng 25:3 * **11:25:** Kalan Kunum 16:22; 14:19

Nem angin Suda kawtiw so,
num ibik biliw kawtiw iso, alik alik i nelo maka
kenemsiliw te.

Nem abiw mutuk fian kawtem unsi ding dim
bakate,

nem aneng kawtiw banim biliw dim kakabi
ding dim bakate,

nem okmun fian kakabi ding dim bakate, di-
wkuw maka i nelo nengeleweko, nenomin
kis kesiliw te.

Mali kawtiw i nelo funum kenemeko, “Nu Ku-
lais elo ‘Fein!’, dangbuluw kunum waneng
nute te!”, nangeko, ikati maka kenemsiliw
te.*

²⁷ Ne bukeko, kutiliw ding kabalak akati aluw-
bamin fian mak aluwsomi,
yemen tew ok tew kesomi,
gilil fian kuluko, asolow ilim akal banim keko,
bisi te.

²⁸ Kate, kal ilum banban kulukabi be nelo kal
dim elo kuw ilum dunemkabe te. Dunemei,
ne kal ilum fian makso mak kulusite: Kutiliw
banim taw banim diwkuw diwkuw ne aneng
aneng angom biim sios kunum waneng im ibolow
fukuneko, im dulum elote ibolow banban keko,
ilum fian kulukabi te. ²⁹ Nimtew angom? Nimin
sios kunum waneng ite mak ibolow beit keliw
tewe, nakati kinkin ibolow keyemeko, sakik ilum
fian kulukabi kasike. Beemdiw, mali kawtiw
mak teleko, mali sios kunum waneng ilo funum
funum keyemiwi, i ikalem fein gelewiliw deiw
kel mit da koyemiw tew, ne mali mit da koyemiw
kawtiw biilo digaka keyembisi te.

* **11:26:** Kalan Kunum 9:23; 14:5

³⁰ Nakunum kumel kunum waneng yutaka! Feinka, ne nakalem wiin elo daolew kebi kate, yu nem bokoyemsi eisneng alik alik be kilele atemeko, kal keliwete: Ilum so, beit so, kenembe beem dim ete kuw nakalem wiin daolewkabi te. ³¹ Yu kililina! Kamok Fian Yesus em Alew Sunbin-Got beem wiin fian ete kuw ne yulo fein sang kale bokoyemite: ³² Sua e, nem Damaskus abiw mutuk fian ka bisi ding dim bakate, emisik kamok fian Aletas em emisik kak yetebe kunum e mali wonuk so kunum ilo kitil weng mak bokoyemei, i uneko, abiw mutuk fian beem wati kitil nam em abisom kilele kuteko, “Fol em abiw mutuk fian kolewko, toloke ding dim bakate, nu elo sok so nit net kelewuma!”, angsiluw te.* ³³ Angsiluw kate, mali fein ibolow so kunum waneng i nelo dokonemsomeliwi, i nelo men fian dim kel abu konemeko, wati kitil nam beem solow tem kel kut elo da konemisiliw te. Konemisiliw kasike, ne ki keko, maka im teing dim kel fon unsi te.

12

Takak Atew mak Fol em Dim Falak Angse em Sang te.

¹ Nakunum kumel kunum waneng yutaka! Ne ibolow fukunkabite: Nem weng kale yulo dokoyeminba keloke kate, yu kitil kebiliw kasike, ne iti nakalem sul so kebi weng makso mak bakayembi te. Yu takak atew falak angse sang so, Kamok Fian mali kunum waneng ilo kukuyemse ibolow win sang so, beem sang mak kame kililina!

* **11:32:** Kalan Kunum 9:23-25

2-4 Mutum kel itol banime ding dim bakate, Kulais eso fewtokobe kunum* mak yemamas em abiil tikin Baladais elo debele unsiliw te. Kunum be kal so kun so yake, finik kuw yake, abiil tikin elo debele unsiliwi, Sunbin-Got ete kuw kal kebe te. Ne akokow kebi te. Kunum be abiil tikin kel bomelei, e kitil so auk so weng mak wosuse kate, kawtiw nu ki keko, weng be nam bakayembuw te.

⁵ Ne kal ilum dunemeko, beit kenembe beem eisneng ete kuw nakalem sul so kebi kasike, kunum beem dulum elote kuw ne ki keko, nakalem sul so kebi kate, nakalem sul kelinba kebi te. ⁶ Ne fein nakalem sul so weng mak bokoyemi tewe, nem yangoki weng be sak dasuw galuw weng kelinba keloke te. Kate, ne yulo nam yangi te. Fein! Yu kanelom nem wiin kuw dao kemokoliw te! Babo! Nimtew angom? Ne ibolow fukunomeli: “Yu nakalem kukuw so, nakalem yangbi kukuyemkabi weng so, ete kuw diw atemeko, gelewoliwka!”, angakabi kasike.

⁷ Feinka! Sunbin-Got e nelo inkal so mali eisneng banban bakilewkabe eisneng mak kukunemse kate, mesik esik nem ibolow e fasu konemei, Sunbin-Got e Seten-Ataanim em dabalale finik mak sil mamin atew mak nem kal dim dukuko, bokonemomele: “Fol kulo betbet kal anggил ilum fian be dukembi kasike, ku kanelom kukalem wiin dawsulemokolew kai!”, nangse kasike.* ⁸ Angei, alemsal ding e, ne Sunbin-Got elo dakalalomeli: “Kal ilum dunembelew eisneng be kulu konema o!”, dangsi kate, ⁹ e yan weng mak

* **12:2-4:** 12:2 Kal kunum i ibolow fukuniwete: Fol em yangse kunum be Fol akalem ete te. * **12:7:** Sow 2:6

bokonemomele: “Nem kulo kukukembi ibolow folok e ku ‘Weso! Kilaka!’, nangolewka! Nimtew angom? Nakalem kitil e kom beit kebelew beem dim e kilele fitewkabe kasike!”, nangse te. Nangei, ne kame kalfongeko, nem beit kebi beem dulum elote nakalem wiin daokabi kasike, Kulais em kitil e fein nem dim kel alakabe te.* ¹⁰ Bomelei, nem beit kenembe ding dim bakate, nem weng minemiw ding dim bakate, nem sakik kenemiw ding dim bakate, nem neniw ding dim bakate, nem kal ilum dunemiw ding dim bakate, ne diwkuw Kulais em aluwbamin beem dulum elote ibolow nanbow so ke alakabi te. Nimtew angom? Nem beit kebi ding kabalak e, nakal kitil kekabi kasike.

Fol em Ibolow Tiaktiak Keyemse beem Weng te.

¹¹ Eke, nakunum kumel kunum waneng yutaka! Ne ibolow galuw kunum kebi kate, yukalem ete nelo nemsulemin beem dulum elote kitil keko, “Kanela! Kanela!”, nangsiliw te. Yukalem ete mali ilo nem sang bokoko, “Fol em wiin daolum!”, yangiw tewe, yu ken kukuw kuw kekabiliw te. Kate, yu beemdiw kelinba kekabiliw te. Feinka! Ne wiin banim kunum kebi kate, ne yom “Mali ilo bakiyemkabiliw kalan kunum ite te!”, yangibiliw kawtiw biim afak kelinba kebi te.* ¹² Yu kilele ibolow fukunina! Nem sua e, yom fukun talsi ding kabalak e, ne yulo diwkuw diwkuw menew ibolow kukuw kukuyemeko, kitil so auk so eisenng banso yom mutuk aluwbabomi, yulo kilele kukuyemomeli: “Ne fein Sunbin-Got em

* **12:9:** Filibai 4:11-13 * **12:11:** 2 Kolin 11:5

kalan kunum nete te.”, yangeko, kukuyemkabi te.* ¹³ Kukuyemsomelii, aneng aneng angom kakamkabi biim sios kunum waneng imdiw yom dim akati kaneyemsi te. Kate, yukalem dim e, ne yulo ilum duyemeko, yom on kisol kulinba kekakawkabi te. Beem dulum elote ne yulo wa keyembi tewe, eke, yu nem sili sili be misim kuw konemina!*

¹⁴ Nakunum kumel kunum waneng yutaka! Kame, yemamas ding yom fukun tolomin memen kebi te. Kesomelii, kame akati ne yulo ilum duyemeko, yom on kisol kulomin ibolow kelinba kebi te. Nimtew angom? Ne yom eisenng kulomin telinba keli kate, yulo kitil kuw keyemii, yulo finik so kulamin deiw kel mo koyemomin beem mongom ete tolomin kebi kasike. Yu kilele ibolow fukunina! Aul gelgel ikati ikalem auk so alew so ilo wanin ilim mesesem weyeminba kekabiliw kate, auk so alew so ite kuw ikalem muluwel ilo yetem alakabiliw te. ¹⁵ Keko beli, ne kalfongeko, nem on kisol alik alik yom dulum elo banim kesomi, nakalem finik so bin akal “Kolin sios kunum waneng im finik so deiw gelewibiliw beem dulum elote banim kelo yo!”, angbi te. Kasike, nem yulo ibolow mutuk fian duyemkabi beem mongom ete yu nelo ibolow mutuk fong gel kuw dunemkabiliw sako?

¹⁶ Keko beli, beem dulum elote weng makso banim kate, mali kawtiw mak bokolomeliw: “Be fein kate, Fol e fimdi famde kunum kesomi, okiwdako, num on kisol mesesem kuluyemkabe kai!”, ange ange kekabiliw te. ¹⁷ Kate, ne fein

* **12:12:** Ulom 15:19 * **12:13:** 2 Kolin 11:9

yulo funum keyemeko, nakalem gomet em dulum elote mali kawtiw yom fukun yemdasoni, yom on kisol biim teing dim kel duyemsiliw on kisol beelo sak kuluyemkabi sako? ¹⁸ Nem Taitus em ibolow silikmolewsomi, eso, fein ibolow kunum mak so, aso ilo yom fukun yemdalii, im yom mit talsiliw ding dim bakate, Taitus e dasuw keyemsomi, yom on kisol mesesem be nem gomet em dulum elote kuluyemse sako? Kate babo! Taitus em ibolow fukunin e, aso nukalem ibolow fukunin e, ki makmak kebomeluwi, alik nu deiw makmak kuw gelewkabuluw te.*

¹⁹ Nakunum kumel kunum waneng yutaka! Mali yu ibolow fukunomeliw: “Fol e akalem fut boko, yangse weng beso akalem kukuw wa so kasi kolewkabe kai!”, ange ange kekabiliw kate, Kulais eso fewtokoko, buluw kunum aso nu Sunbin-Got em kiin dim e, fein weng kale beemdiw angakabiliw kawtiw biilo bokoyemuwete: Nu weng be fut tem kel boko, “Yom fein ibolow e kitil keyembuluw te!”, angeko, beem mongom ete kuw bosuluw te. ²⁰ Nimtew angom? Ne fin-ganeko, ibolow fukuni ete: Mesik yom mit toloki ding dim bakate, ne yol angeko, “Yakai! Sios kunum waneng biim kukuw e nakalem fukunin beem ki kelinba kelei, i sakalaw keko, weng bo bo kebiliw kai!”, angeko, yulo digaka keyemoki kasike. Keyemii, yom fukunin “Ne nanbow keko, kaneloki kai!”, nangbiliw fukunin bakati nem kaneloki kukuw beelo ki kelinba keloke kasike. Mesik ganbin e,

* **12:18:** 2 Kolin 8:6,16-18

on kelew kelew kebin e,
 kaisu w kemin e,
 bongge bongge kemin e,
 desi kelew kelew kemin e,
 kawtiw yam dakamin e,
 fasu kolew kemin e,
 sakok kemin e,
 beem kukuw e yom dim kel alakabe kasike.
 21 Bomelei, nem yom fukun teli ding dim bakate,
 Sunbin-Got e nem wiin iti yom kiin dim kel kalak
 da konemoke te. Konemei, ne mali sili sili kukuw
 gelewkakaw kabiliw kawtiw im dulum elote sakik
 ilum fian mak kuloki te. Nimtew angom? Kawtiw
 bi kilele ibolow alwol kelinba kesomi, ikalem wa
 kukuw kolewinba kekabiliw kasike. I sua emdiw
 kame akal, ikalem kal anggil dim em “Kanelina!
 Kanelina!”, yangbe beem kukuw gelewoko, osow
 kesomi, alik alik inkal so duyemkabe kukuw kuw
 gelewkabiliw kasike.*

13

Fol em Kewkew Weng te.

1 Nakunum kumel kunum waneng yutaka!
 Yemamas ding kabalak e, ne yom fukun toloki
 te. “Yemamas ding”, yangsi beem dulum elote
 Sunbin-Got em fut tem bokolomele:
 Alew bani alemsal kawtiw bongguko,
 bokolomeliw:
 “Nu kiinwala suluw te!”, angiw tewe,
 ilum diw atebabiliw kunum ikati ‘Fein kai!’, an-
 goliwka!”,

* 12:21: 2 Kolin 13:2

angse kale.* ² Nem emteben ding yulo yetebam talsi ding kabalak e, ne sili sili kukuw gelewka-biliw kawtiw ilo kilele bokoyemsi kate kame akal, iti alik alik yulo bakayembite: Nem yemamas ding toloki ding kabalak e, ne sili sili kukuw gelewka-biliw kawtiw biim kiin dim e kitil kuw moko, ilo iti kinkin kukuw kuw kukuyeminba keyemsomi, ilo kilele kilelyemoki te. ³ Nimtew angom? Yu bokolomeliw: “Fol e fein Kulais em bontem dim bakabe kunum ete sako? Nu kilele kal keluma!”, ange ange kekabiliw kasike. Yu kilebi boliwka! Kulais be yom mutuk dim kel beit kelinba kebe kate, e kitil auk so keko, yom dim e kitil kebomi, alakabe kasike. ⁴ Feinka! Sua e, e kunum awet nukatew kelei, i imel kuw kelewsomi, elo sil biki asiliw kate, Sunbin-Got em kitil e elo dawkalfolei, e kame beem kitil e finik so bin keko, alakabe te. Beemdiw, nu Kulais eso fewtokoko, bomi, beit kebuluw kate, Sunbin-Got em kitil e nukati finik so keyemei, nu yom mutuk kel kitil so aluwkakawkabuluw kasike.*

⁵ Nakunum kumel kunum waneng yutaka! Yu yukalem fein ibolow be diw atemeko, “Fein ibolow yake?”, angeko, kilele diw atebamoliwka! Diw atemsomeliwi, yu “Yesus Kulais e num mutuk tem kel alakabe kai!”, anginba keliw tewe, yom angbiliw fein ibolow be fein bate. Dasuw te.*

⁶ Keko beli, yu yukalem diw atemiw tewe, yu nukalem aluwbamin bakal diw atemeko, kilele kal keliwete: Num “Fein!”, dangbuluw ibolow bakati fein te. ⁷ Kate, mali kawtiw i nulo diw yete-

* **13:1:** Sawa Weng 19:15; Matyu 18:16; 1 Timoti 5:19 * **13:4:**

Filibai 2:7-8 * **13:5:** 1 Kolin 11:28

meko, “Aso biim fein ibolow so, biim aluwkabiliw so be Sunbin-Got em kiin dim e ki kelinba kebe kai!”, yangiw tewe, im yangbiliw weng be aso nulo sakik duyeminba kebe te. Nimtew angom? Nukalem ibolow fukunin fian e kanekote: “Yu kanelom wa kukuw mak kemokoliw te!”, aneko, Sunbin-Got elo dakalomeluw: “Ku Kolin abiw mutuk fian em sios kunum waneng ilo dokoyema!”, dangakabuluw kasike. ⁸ Feinka! Nu kanelom ki keko, num yulo kukuyembuluw Sunbin-Got em Weng Kal Ken Ati fein be dawkatiko, kolew-bokoluw te! Bate. Kate, nu diwkuw fein weng beem folok ibolow fukunkabuluw te. ⁹ Keko kasike, aso nu beit nam kebuluw kate, yu kitil keko, moliw tewe, nu beem dulum elote kalfongkabuluw te. Nimtew angom? Nu Sunbin-Got elo dakalalomeluw: “Ku Kolin abiw mutuk fian beem sios ilo kal fian duyemew kasike, i ikalem dim kel em wa kukuw gel mak bakati kom kiin dim kel kilelemoliwka!”, dangeko, eso diwkuw bokolew bokolew kebuluw kasike.

¹⁰ Nem singam kel bisi ding ka kel e, ne fut kale boko, yulo dabalayemsomi, ibolow fukunomeli: “Mesik yom fukun toloki ding kabalak e, ne kitil weng makuw bokoyemeko, yom kukuw wa kilele keyemoki kasike!”, angbi te. Nimtew angom? Yulo de mit da koyemomin beem dulum elote bate. Kate, yulo kitil kuw mo koyemomin beem dulum elote kuw Kamok Fian e nelo akalem wiin so amkoko, konemse kasike.*

¹¹ Nakunum kumel kunum waneng yutaka! Yu nem fefe teingabi kel weng kale kililina!

Mak e, yu kalfongina!

* **13:10:** 2 Kolin 10:8

Mak e, wa kukuw gel mak yom dim be tewe, yu
Sunbin-Got em kiin dim kel kilelina!

Mak e, mali ilo kitil kelew kelew kukuw kem-
ina!

Mak e, ibolow fukunin ki makmak kelina!

Fefe e, ibolow menew kukuw kuw keemina!

Angiwi, ibolow mutuk fian so ibolow menew so
beem mongom kayak Sunbin-Got e yuso bomaka!

¹² Alik alik yu Sunbin-Got em angin num kukuw
geleweko, yengimel yukalem falal kolew kolew
keko, “Biliw yako!”, yangboliwka!

Yu kililina! Kulais em sios kunum waneng alik
alik ikati yulo “Yukalo!”, yangiw te.

¹³ Kamok Fian Yesus Kulais em ibolow folok e,
Sunbin-Got em ibolow mutuk fian e, Sunbin-Finik
eso ibolow ki makmak kebin em kukuw e, alik alik
yuso bomaka!

Bete kuw. Aso num fut weng boyemuw fut
kame kilaka.

**Sunbin-Got em Kitakamin Weng
The New Testament and part of the Old Testament in
the Bimin Language of Papua New Guinea
Nupela Testamen na sampela hap Oldpela Testamen
long tokples Bimin long Niugini**

Copyright © 2008 Bible Society of Papua New Guinea

Language: Bimin

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-10-03

PDF generated using Haiola and XeLaTeX on 11 Nov 2022 from source files dated 9 Oct 2020

bb2442dc-1805-519d-89d0-e1d6e66abeba